

MAFUTAGA FAAFOUINA FAIFEAU MA A’OA’O TAUSINUU
KOLISI FAAFAIFEAU MALUA, 29 SETEMA–01 OKETOPA, 2022
SUESUEGA MAI LE FEAGAIGA FOU

“Motu o tagata”: Faalauteleina ma le ma’ale’ale o le ola mulimuli ia Iesu.

Faatulima.

I le suafa manumalo o Iesu Keriso lo tatou Alii ma le Faaola, o le Ao foi o le Ekalesia, ou te ofo alofa atu ma faatalofa atu i le paia maualuga o lenei mafutaga...

Faatomuaga.

O lenei suesuega mai le Feagaiga Fou, o le talatalaina lea o le uiga o le upu Eleni *ὄχλος/ὄχλοι*, e faaaoaga i ai le tatou faaliliuga faaSamoa, ‘motu o tagata’. O le uiga o le manatu, o le faaupuga, ‘motu o tagata’, e mafai ona ia faalauteleina le uiga o le upu Eleni, ina ia aofia ai tagata uma sa mulimuli ia Iesu i le saili fesoasoani, ae faapea foi i latou sa tete’e ma taulamalama ia Iesu, e tusa ai ma le molimau a Mareko. O le faamoemoe o lenei pepa ina ia laugatasia tagata uma o mulimuli ia Iesu i totonu o le li’o o le ‘motu o tagata’. Ma ia o tatou mata’itū ma iloilo pea lo tatou ola mulimuli i taimi uma, ae lē o le tusitusilima, tau-leagaina, ma tutuli ese isi tagata o loo taumafai foi i ō latou tulaga o so’o tau mulimuli.

Suesuega.

O le uiga masani o le upu Eleni, *ochlos*, e faasino lea i se faapotopotoga o tagata lautele e aunoa ma ni faasinomaga e iloa ai i latou (*identity unspecified*).¹ Mai lea faauigaga, na afua mai ai ni mataupu silisili faalotoifale mai itulagi o loo atagia ai le tulaga maualalo ma le lē taualoa o tagata lautele i totonu o le sosaiete.² E faapea foi tagata o ola taotaomia ua latou faalauteleina le uiga o le upu Eleni, e faailoa ai i latou o loo saisaitia ma ola pule esea i lalo o pulega faamalosi a isi (*dictatorship* – South Korea, 1980s), ae faapea foi i atunuu sa ola i lalo o pulega faa-kolone (*postcolonialism* – Initia).³

E o’o foi i le vao-iliili o suesuega faa-tusiga, ua iloa ai foi le toe talatala atili o le uiga o le upu *ochlos*, ina ua faaaoaga e tagata suesue, e pei o le tamaitai o Elisapeta Malbon,⁴ isi fuifui-upu Eleni e uiga tutusa ma le *ochlos*, e i ai le upu *πληθος* (motu o tagata, 3:7–9); *πολλοί* (motu o

¹ Frederick William Danker, ed. *A Greek-English Lexicon of the New Testament and other Early Christian Literature*, third edition, based on Walter Bauer, *Griechisch-deutsches Wörterbuch zu den Schriften des Neuen Testaments und der frühchristlichen Literatur*, sixth edition, ed., Kurt Aland and Barbara Aland, with Viktor Reichmann and on previous English editions by W.F. Arndt, F.W. Gingrich, and F.W. Danker (Chicago and London: The University of Chicago Press, 2000), 745. Faapea foi, “Thayer’s Greek-English Lexicon of the New Testament,” in *Greek-English Lexicon of the New Testament*, paragraph 2; “ὄχλος,” *MGD*, paragraph 10953, ua faaopoopoina le uiga o le *ochlos*, e faasino i le potopotoga o tagata ua lē iloa le mafuaaga ua potopoto ai (*confused multitude of people*).

² Volker Küster, “Jesus and the minjung revisited: The legacy of Ahn Byung-Mu (1922–1996),” *BI-JCA* 19.1 (2011): 2, <http://eds.b.ebscohost.com/divinity.idm.oclc.org/eds/pdfviewer/pdfviewer?vid=1&sid=0adbf3ac-b0ac-4d21-a296-375ca3ff9c85%40sessionmgr103>. E faapea foi, Joong Suk Suh, “Discipleship and Community in the Gospel of Mark” (Ann Arbor: University Microfilms International), published PhD. Diss., Boston University Graduate School, 1986), iii–iv, ua ia faauigaina le ‘motu o tagata’ o se vaega o tagata o loo tupito i tua lo latou faatulagaga i totonu o le sosaiete (*people on the periphery of society*).

³ David Joy, “Markan subalterns. The crowd and their strategies of resistance: A postcolonial critique,” *BT* 3.1 (London: Equinox Publishing, 2005): 55; Donna Landry and Gerard MacLean, eds., *The Spivak Reader* (New York: Routledge, 1995), 203, ua ia faamatalaina le ‘motu o tagata’ o ni tagata lē taualoa (*non-elite*) pe taotaomia ma lē amanaiaina lo latou soifuaga (*subordinated social groups*).

⁴ Elizabeth Struthers Malbon, “Fallible Followers: Women and Men in the Gospel of Mark,” *Semeia*, January 1 (1983): 126–130.

tagata, 6:33–34), *ἄλλοι* (o nisi tagata, 11:1–11), ma le upu *πᾶς* (tagata uma, 2:1–12). O upu uiga tutusa nei ua faalautele atili ai le li’o o le ‘motu o tagata’, ma faailoa mai ai faasinomaga o i latou o militino faatasi i totonu o le faapotopotoga o tagata lautele.

Faataitaiga 1: *plēthos*=*ochlos*, 3:7–9.

O le faaaogaina e Mareko o le upu *plēthos*, ua iloa ai faasinomaga o tagata o ta’ua i lea vaega o le tala. O le *plēthos* muamua o loo faamatala ai le “motu o tagata e toatele mai Kalilaia” (3:7). O le isi *plēthos* o loo faamatala ai le isi ‘motu o tagata’ e toatele mai Iutaia, Ierusalema, Itumaia, mai tala atu o le Ioritana, faapea i latou mai Turo ma Saitonu (3:8). O ia *plēthoi* e lua e leai se faailoga tagata o atagia ai, ina ua tuu faatasia e Mareko tagata Iutaia ma tagata o nuu ese, i totonu o le li’o o le ‘motu o tagata’.

Peitai, e o’o mai i le fuaiupu e iva ina ua ō mai faatasi *plēthoi* eseese nei e lua, ona faaoga lea e Mareko o le upu *ochlos*, e faasino i ai latou uma nei ua lolofi faatasi atu ia Iesu i tafatafa ane o le vai ma ua latou fetaomi ia te ia, ona o le fia faamaloloina (3:9).

Mai lenei faataitaiga, ua manino mai ai faasinomaga o i latou o aofia i totonu o le ‘motu o tagata’, e i ai o latou nuu (Ierusalema), o itumalo (Kalilaia, Itumaia, Turo ma Saitonu), ae maise o tū ma aga ma talitonuga masani (tagata Iutaia ma tagata o nuu ese), faatasi ai ma tagata mama’i, ua tauasa mamao mai lava i le fia mapu mai ma’i o le tino ua aafia ai, i le mulimuli ma faatasi atu i le Alii o faamalologa.

Faataitaiga 2: *polloi*=*ochlos*, 6:30–44.

O le vaega lenei o le tala e taula i le fafagaina o le motu o tagata e toatele (*ochlos*), e aofia ai ma tamaloloa e limagaafe (6:44). E amata le tala i ripoti a le au aposetolo (6:30) e tusa ai ma le latou misiona (6:7). Ua ma’ea lea, ona finagalo lea o le Alii ina ia o latou mapu atu i se nofoaga tuufua (malaga i le vaa), tau lava na o i latou, ona o le toatele o le motu o tagata (*polloi*) o feoai solo, ua o’o lava i se taumafataga ua lē mafai (6:31).

E ui i lea naunautaiga mo se faasiliga malosi (ai ma malolo), a ua iloa atu i latou e le ‘motu o tagata’ (*polloi*),⁵ o tagata mai aai uma, ua ūi ā uta, ua muamua ia te i latou (6:33).⁶ Peitai, e taunuu le faigamalaga, ua tumutumu ai le motu o tagata e toatele (*ochlos*) ona mutimutivale ai lea o lona alofa, ona o nei tagata ua pei o ni mamoe ua leai so latou leoleo (6:34). Ma faatino ai loa le vavega o le fafagaina o lenei motu o tagata mai areto e lima, ma i’a e lua lau (6:38), ae totoe ai ato e sefulu ma le lua mai tōega (6:43).

E ui e lē o auiliili mai poo fea nuu e ō mai ai i latou nei (mai aai lava o Kalilaia), a ua manino mai o latou manaoga faa-le-tagata, o ē ua matelaina i le fia aai, ma ua leai foi ni ō latou taitai e fesoasoani mo i latou. O tagata ua tu’ulafoaina e le sosaiete. O le ala lea o le lolofi atu ia Iesu ina ia faamalieina o latou manaoga o le tino, o le fia aai.

Faataitaiga 3: *polloi*=*ochlos*=*pantas* (*pas*), 2:1–12.

O le tala i le faamalologa o le tagata ma’i supa sa tauamo e ana uō (v.3), sa latou vavane i le taualuga o le fale ma tuu ifo o ia i lalo ia Iesu, ina ia faamaloloina. E amata le tala i tagata e toatele (*polloi*, v.2) ua fetaomi faatasi i totonu o le fale, e faalogologo i aoga a le Alii. Ua o’o

⁵ E tutusa le manatu o le tamaitai o Rebecca Eklund ma Malbon i le faaaogaina e Mareko o fuifui upu Eleni e uiga tutusa ma le *ochlos*, e faalautele ai le uiga o le ‘motu o tagata’. Rebecca Eklund, “From “Hosanna!” to “Crucify!” The Fickle Crowds in the Four Gospels,” *BBR* 26.1 (2016): 26.

⁶ E manatu nisi e mafai ona iloa lelei le taoto mai o le Vai o Kalilaia i lona atoaga, e o’o atu lava i le isi itu vai le vaai, i aso e lagi lelei ai.

lava i le faitotoa ua leai se avanoa, ona o le motu o tagata (*ochlos*, v.4). O le mafuaga lea o gaioioiga a uō a le tagata ma'i supa.

A o lea faapotopotoga o tagata, o loo militino faatasi ai ma nisi o le au tusiupu, na latou fesiligia i o latou lava loto, le pule a Iesu e faamagalo ai agasala a le tagata ma'i supa. O le latou talitonuga, ua fāifāi Iesu i le Atua, auā na o le Atua e patino i ai lea matafaioi o le faamagaloina o agasala. Sa silafia lelei e Iesu o latou manatunatuga ma ia faamalolo ai loa le ma'i supa, ina ia faailoa atu i le au tusiupu, o le Atalii o le Tagata ua tuuina i ai le pule e faamalolo, e lē gata o le tino ma'i, ae faapea foi i le agaga, i le faamagaloina o agasala.

I le taunuuga o le tala i le fuaiupu e 12, fai mai, ua iloa e tagata uma (*pantōn*) sa auai i le fale le faamalologa ua faia, ona latou tau fai ofo ai lea ma latou vivii i le Atua. O lona uiga, o tagata uma sa i le fale i lea taimi, e i ai le *pollo* (*ochlos*), le ma'i supa ma ana uō, Iesu ma ona so'o, faatasi ai ma nisi o le au tusiupu, ua aofia faatasi uma i totonu o le faapotopotoga lenei, le 'motu o tagata', e ui i le eseese o mafuaaga o le mafuta atu o le au tusiupu.

O lenei faataitaiga ua iloa ai le auai atu foi o tagata sa tete'e ia Iesu (ona o le eseese o talitonuga), ma ua tā aofai ai ma i latou i totonu o le faapotopotoga o tagata lautele, le 'motu o tagata'. Pe saili fesoasoani, pe e ese nisi mafuaaga sa auai atu ai ma mafuta faatasi ma Iesu, a ua faailoa mai e nei faataitaiga, le eseese o finagalo, ae maise o le ma'ale'ale ma le fete'enai o lagona o nisi o le motu o tagata sa mulimuli ia Iesu.

E lē na o taitai foi o le lotu Iutaia ma pulega faa-Roma sa tete'e i le Alii, auā e o'o lava i le auso'o filifilia o Iesu sa latou teena o Ia ma sosola ese i taimi o ona mafatiaga (ft. 14:50). O Peteru foi sa ia teena ma upu leagaina le Alii (14:68, 70, 71), ae maise foi i tina sa latou molimauina le tuugamau tuufua, sa latou sosola ese ma le matatau, ina ua faailoa atu ia tei latou ua toe soifua le Alii (16:8).

O le uiga o se manatu, ina nei mea ane ua tatou tu'ua'ia na o le au tusiupu, faresaio, ma taitai o le lotu Iutaia i le tete'e ia Iesu ma Lana galuega (ft. 2:16, 24; 3:2, 22; 7:1–16; 8:15; 10:2; 11:18; 12:12–13, ma isi).⁷ Auā na o'o foi i le auso'o ma nai tina sa mulimuli ia Iesu sa pa'u'u foi i lea vaivaiga i nisi o taimi. E lē o le faamoemoe ia saili le sesē ma le sa'o o le ola mulimuli, a ia o tatou mafaufau loloto ma su'esu'e le tagata ia te ia lava, pe lē o tatou isi tagata o le 'motu o tagata' o mulimuli ia Iesu, ae sesē le alafua ma le faamoemoe, ona o le mata felefele o vaega eseese o le soifuaga o tatou ola ai, i totonu lava o le lotoifale o Samoa i nei ona po.

'Motu o tagata' faalotoifale i Samoa.

E i ai lava le manatu, o le tatou faaliliuga faaSamoa, 'motu o tagata', o se finagalo o tamā o le Ekalesia sa latou faaliliuina i le gagana Samoa le Tusi Paia, ina ia atagia ai le siosiomaga faalotoifale o Samoa i ia vaitaimi. O taimi ia na sopoia ai e tagata papālagi tuaoi ma eleele o Samoa, ma nofoia ma faamautu ai le toatele o i latou i Samoa nei, e pei o misionare, tagata faimalaga i feafaatauina ma faiga faiva, o tagata o upu-fai faavaomalo, ma isi. O papālagi nei na faaopoopo i le faitau aofai o tagata o le motu (tagata Samoa), ma sa nonofo faatasi ma atia'e Samoa mo se lumanai manuia, e ui i aafiaga ogaoga mo tagatanuu o Samoa i faamai, tu ma aga mai fafo, faatauina o fanua, o taua ma fevaevaeaiga, ae maise i taimi o pulega faa-kolone sa pule esea ai o tatou lava tagata, i totonu lava o Samoa.

⁷ E tusa ai ma faamaumauga a Mareko, e iai foi isi taitai o le lotu Iutaia sa saili fesoasoani ia Iesu, e pei o Iairo le taitai o le sunako i Kapanauimi (5:21–24, 35–43), o Iosefa le Arimataia, le tasi o faipule sili, na ia talosaga ia Pilato e ave i le tino o le Alii ma tuu i le tuugamau (15:42–46). Sa i ai foi le tasi o tagata mauoa sa ia saili ia Iesu sona avanoa i le ola faavavau, peitai ua sili atu ia te ia ana oa, na i lo le faasoa atu i tagata matitiva (10:17–22).

O le uiga o se manatu, o le tatou faaliliuga faa-Samoa, ‘motu o tagata’, ua tuufatasia ai tagatanuu moni o Samoa, ma i latou mai fafo ua avea Samoa ma o latou foi faasinomaga, e ui i le eseese o talitonuga, tu ma aga, a o le mafuaaga foi o le o’o mai.

O aga masani foi i le tatou gagana Samoa (e oge upu i nisi o taimi), e faaaoga ai faaupuga po’o mua-gagana e faamatala ai se mataupu ua tulai mai. A o ia faaupuga e afua mai i vaega o le olaga o aso fai soo, ma mea e tutupu i le siosiomaga ma le lotoifale o tagata Samoa. E faapea foi se manatu i le tatou faaliliuga faaSamoa, ‘motu o tagata’, ona e lē gata i le leai o se tatou upu Samoa e faaliliu ai le *ochlos*, ae o vaega foi sa tutupu i ia vaitaimi ma le lolofi mai o tagata mai fafo ma nofoia laueleele o Samoa, ua afua ma ua talafeagai lelei ai lenei faaliliuga faa-Samoa, ‘motu o tagata’.

I le faaaogaina ai i totonu o le Tusi a Mareko (Tusi Paia Samoa) o le faaupuga lenei ‘motu o tagata’, o loo faaliliuina ai le vaega tele o loo faaaogaina ai le upu *ochlos* (NA28 Greek NT), sei vagana ai le 11:32 (nu’u), ma le 12:12, 41 (‘vao o tagata’). O le faaupuga foi, ‘motu o tagata’, o loo faaliliuina ai isi upu Eleni e pei o le *plēthoi* (3:7) ma le *polloi* (6:33), o loo ta’ua i faataitaiga o i luga.

I se manatu o le pepa, o nei faaupuga faaSamoa – ‘motu o tagata’, ‘nu’u’, poo le ‘vao o tagata’, e uiga tutusa lava ma fuifui upu Eleni o loo latou faaliliuina felafolafo’ai – *ochlos*, *plēthos*, *polloi* ma isi. O le faaaogaina foi o nei faaupuga eseese, ua faalauteleina ai le uiga masani o le upu *ochlos*, e faailoa ai ituaiga tagata eseese o mulimuli ia Iesu, faapea le ma’ale’ale o latou manao ma lagona (saili fesoasoani pe tau lamalama, talia pe tete’e, mauoa pe mativa, ma’i pe malosī, tagatanuu pe tagata o nuu ese, taualoa pe maualalo le tulaga i le sosaiete, taitai pe auauna, ma isi faasinomaga eseese).

O le faailoaina mai lava lea e le tusitala o Mareko, e pei foi ona atagia i le tatou faaliliuga faaSamoa, le tulaga tutusa ma le aofia faatasi ai o tagata uma (*inclusive*) ua lolofi atu ia Iesu, tusa lava pe eseese manaoga sa mulimuli ai.

‘Motu o tagata’ (Samoa) i nei onapo.

A tuu mai foi i lo tatou lotoifale o Samoa i nei onapo i vaega eseese ma mea sa tutupu, o loo tutupu, ma e ono tutupu mai i le lumanai, e mafai ona faapea le manatu o le pepa, o tatou (tagatanuu Samoa ma le toatele o isi tagata o le motu ua avea Samoa ma o latou faasinomaga), o tatou lava o loo lotolotoi faatasi i totonu o le li’o o le ‘motu o tagata’, ina ua tatou taliaina le Talalelei ia Iesu Keriso ma mulimuli e faatino lona finagalo i tiute ma tofiga ua valaauina i ai le soifua ma le ola.

Peitai, e ui ina ua tau-kerisianoina i tatou i le faatuatua ma le talitonu i le Keriso Toetu, ae i ai foi taimi o le soifuaga e pogisa ai la tatou vaai ma tutuli o tatou taliga i aoaoga ma faataitaiga sa faatino e le Alii. O taimi ia ua faamuamua ai o tatou lava manatu ma se iloa, ua faapito ai manū ia tasi i se silasila ma le faamamafa, ae maise o le ‘eu’eu ese o nai tagata e lē taualoa ma maualalo le tamaoaiga.

E lē o pō foi malaē i gasegase o malo (sa tutupu ma o loo tutupu pea), sa tauau ina malepe ai upu fai o malō, ma fetosoaina ai ma faaaoga le suafa paia ma le finagalo o le Atua ina ia faamalie ma faamaonia manaoga o le tagata, ua tulaga tutusa ai tatou ma taitai o le Lotu Iutaia (sa tete’e ia Iesu), taitai o pulega faamalosi (e pei o Roma sa sauāina tagata kerisiano), ma pulega faa-kolone (sa pule esea tagata Samoa). O ituaiga taitaiga ia ma faatinoga ua taotaomia ai le ola mulimuli o isi e fai ma soo, ma o latou saolotoga faa-le-tagata.

O lea ua 60 tausaga o tutoatasi Samoa (ma le EFKS, 192 tausaga o le Talalelei i Samoa) ma ua tatau ona sologa lelei lana taitaiga ma le tofā, ae maise o le tamaoaiga faasoa i tagata uma o le motu (Samoa). Peitai, o loo tele lava faafitauli eseese o loo aafia ai tagata lautele i le maualuga o le tau o le soifuaga, tagata lē taualoa ma i latou o loo tulaga maualalo pea le tamaoaiga, ae o loo faateteleina pea le oa a i latou o maumea ma le au fai pisinisi.

Ua ese isi malosiaga tetele ua faatautaia le soifuaga o aso fai soo. Ua tulaga maualuga aitalafu nonō mai atunuu i fafo ona o le naunau i atinae tetele (auala taavale ma auala laupapa, foga-fale maualuluga, malae vaalele ma uafu e lē o faaaogaina, ma isi atinae e lē o moomia). O le taaviliga o fefaatauaiga i le lalolagi ua puleaina le tamaoaiga o Samoa i le tau o le soifuaga ma faateleina ai le tamaoaiga o le au fai pisinisi, ae tigaina ai tagata lautele. O fesuiaga ogaoga o le tau ua aafia ai le toatele o tagata Samoa (ma atunuu laiti) ae afua mai atunuu o lelei le tamaoaiga ona o le faaaoga soona-fai o alamanuia faalenatura.

E o’o foi i talitonuga faatapuaiga, ua iai tagata o le motu (Samoa) ua latou teena ma fulitua i le Talalelei i le Keriso Toetu, a ua talia ma tapuai i isi atua ma isi talitonuga – Isalama, Bahai, Mamona, Molimau a Ieova, ma isi). I totonu foi o le li’o o le EFKS ua iai faafitauli i le faaaoga ma le lē tatau o taulaga e maua mai le soifua tautua o tagata lotu (faataitaiga: toe faafouina o le fogā-faleono i Tamaligi ma faafitauli sa tulai mai ai).

O ituaiga faatinoga nei sa lapatai ma faitio ai Iesu, e pei o le “alo ese mai i mea faafefete a le au faresaio, ma le mea faafefete a Herota” (8:15), o faailo o le ola faafoliga ua taitai sesēina ai tagata lautele; o le faaaogaina o le malumalu e tagata fai pisinisi e fai ma “ana o e fao mea” (11:17), e saili ai o latou manuia; o “Keriso pepelo ma perofeta pepelo” (13:22), o faasesēina tagata talitonu; ae faapea foi i le “au tusiupu, o ē ua fia evaeva ma ofu tatapuvae...[ae] latou [te] faauma fale a fafine ua oti a latou tane, ma faalevaleva le tatalo e fai ma ufiufi, e atili ai ona faasalaina o i latou” (12:38–40).

Faatatau.

O vaega eseese ia o le soifuaga e ao ai lava ona tatou suesue pea ma saga iloilo i lo tatou ola mulimuli e fai ma soo, i totonu o le tatou lotoifale faaEFKS, o tatou o se vaega o le ‘motu o tagata’. E pei ona taumafai atu ai lenei pepa, o le tele o taimi tatou te saili fesoasoani ai i le Alii ina ia o tatou mapu mai mafatiaga eseese o tatou aafia ai, ma saili lana faasinomaga mo i tatou. E i ai foi taimi tatou te fesiligia ai le Alii ona o mea e tutupu i le soifuaga, ae maise o lo tatou fulitua i lona finagalo ma ana aoaoga, i nisi o taimi, ae ua fai lava o tatou loto ma manao.

E faatupu manatu foi mo i tatou lenei tusiga ina ia o tatou vailiili pea i taimi uma, pe lē o tatou isi tagata o taotaomia ai le ola mulimuli o isi, e lē gata i totonu o tatou lava aulotu, i totonu o Malua nei, ae maise le Ekalesia Aoao, i a tatou faaiuga fai ma faatinoga. Ma ia o tatou mauintoa, o tatou uma o tagata o mulimuli i le Alii, e tulaga tutusa uma ai i tatou i totonu o le lio o le ‘motu o tagata’, i le faatinoga o le ola mulimuli ina ia o tatou faia pea le finagalo o le Alii, mo le manuia o isi tagata i lo tatou ola valaauina.

E pei ona alaga le Alii i le amataga o le Tusi a Mareko ma valaau mai, “Ua o’o mai ona po, ua latalata mai le malo o le Atua; ina salamo ia, ma faatuatua i le tala lelei” (1:15). O le valaau mo i tatou uma, pe sa’o pe sesē, pe moomia le fesoasoani pe leai, pe tete’e ma ese ni o tatou lagona, a ua valaaulia i tatou uma ina ia salamo, faatuatua, ma auai atu i manuia o le malo o le Atua, ua saunia mo ona tagata o loo tumau pea i le talitonu, ma galulue ponou’ai i le faatuatua.

O lea foi le valaau alofa o loo taualuga ai le tala a Mareko, ina ua valaaulia e Iesu ona soo sa teena ma sosola ese i taimi o ona mafatiaga, faapea tina sa tau mulimuli mamao ma molimauiina le Keriso Toetu, e ui i lo latou matata'u ma le fefefe, ina ia latou toe faatasitasi uma i Kalilaia, latou te iloa ai le Keriso Toetu. O le mafutaga a tagata ua faamagaloina o latou vaivaiga faale-tagata sa i ai, ae tapenaina i latou i le faatuatua mo le faaaauuina o le galuega faaola mo isi tagata, ina ia faatupulaia pea le toatele o le 'motu o tagata', o fia mulimuli ma saili i le Atua.

O lea foi le valaau mo i tatou, e ui i taimi tatou te teena ma fultua ai i le Alii i sa tatou auaunaga o loo fai, a ua toe valaaulia i tatou ina ia o tatou toe mafuta ma le Keriso Toetu, e toe faamalosi ma fesoasoani i lo tatou vaivai. O le valaaulia ina ia saga faaaupagaina ai i tatou mo le galuega faaaaua i le 'motu o tagata', i totonu o nuu ma alalafaga ae maise o aulotu taitasi, ua valaauina i ai le soifua ma le ola, e ui i le ma'ale'ale ma le eseese o talitonuga, o tagata o mulimuli i le Alii.

Ia manuia tele le mafutaga, ma ia viia le Atua i lo outou soifua galulue, ae ola le Feagaiga Fou ma Malua i le alofa o le Atua, Amene.

Ia manuia tele le Mafutaga Faafouina, 2022.